

ORDENANZA Nº 21

ORDENANZA FISCAL REGULADORA DAS TAXAS POLA PRESTACIÓN DO SERVIZO DE AXUDA NO FOGAR (SAF)

ARTIGO 1. FEITO IMPOÑIBLE.

Constituirá o feito impoñible desta taxa a prestación do servizo de axuda no fogar.

ARTIGO 2.- SUXEITOS PASIVOS.

Serán suxeitos pasivos, obrigados ao pagamento destas taxas quen se beneficien da prestación dos servizos sociais comunitarios prestados polo Concello de Vigo en función da súa capacidade económica. No caso de que as persoas anteriores carezan de capacidade de obrar, a obriga recaerá sobre quen ostente a súa representación legal.

ARTIGO 3.- EXENCIÓNS E BONIFICACIÓNS.

Agás o disposto no artigo 4 seguinte e normas con rango legal ou tratados internacionais, non se admitirán outros beneficios fiscais nestas taxas.

ARTIGO 4. COTAS.

1. CONTÍA.

A contía da taxa será a resultante de aplicar, en función da capacidade económica dos usuarios:

- a) Unha porcentaxe da capacidade económica, nos usuarios de dependencia.
- b) Unha porcentaxe do prezo/hora de prestación do servizo, nos usuarios de libre concorrencia. Esta porcentaxe variará en función da capacidade económica da persoa usuaria.

2. DETERMINACIÓN DA CAPACIDADE ECONÓMICA NO SISTEMA DE ATENCIÓN A PERSOAS USUARIAS DEPENDENTES.

2.1. A capacidade económica das persoas dependentes valoradas que teñan recoñecido un dereito de atención mediante o SAF calcularase de acordo coas normas de valoración contidas no capítulo II do título III

do Decreto 149/2013, do 5 de setembro, polo que se define a carteira de servizos sociais para a promoción da autonomía persoal e a atención ás persoas en situación de dependencia e se determina o sistema de participación das persoas usuarias no financiamento do seu custo.

2.2. A capacidade económica da persoa usuaria será a determinada na resolución do Programa Individual de Atención (PIA) que, consonte ao previsto no Art. 38.2 do Decreto 15/2010, do 4 de febreiro, incluírá un pronunciamento expreso sobre a participación do usuario no custo dos servizos.

3. DETERMINACIÓN DA CAPACIDADE ECONÓMICA DAS PERSOAS USUARIAS DO SAF DE LIBRE CONCORRENCIA.

No SAF prestado a persoas ou unidades de convivencia distintas ás referidas no artigo anterior, o cómputo da capacidade económica farase de acordo cos seguintes criterios:

3.1. Computarase a renda de todas as persoas residentes na mesma unidade de convivencia. Para estes efectos, considérase «renda» a suma de calquera das modalidades de ingreso a que se refire o Art. 6.2 da Lei 35/2006, do 28 de novembro, do Imposto sobre a Renda das Persoas Físicas.

3.2. Computarase, así mesmo, o patrimonio neto de todas as persoas residentes na unidade de convivencia. Para estes efectos, enténdese por «patrimonio neto» o conxunto de bens e dereitos de contido económico dos que sexan titulares, determinados consonte coas regras de valoración recollidas na Lei 19/1991, do 6 de xuño, do Imposto sobre o Patrimonio, con dedución das cargas e gravames de natureza real que diminúan o seu valor, así como das débedas e obrigas persoais das cales deban responder.

Igualmente, para o cómputo do patrimonio neto deberán terse en conta as exencións que prevé a Lei 19/1991, do 6 de xuño, do Imposto sobre o Patrimonio, respecto da vivenda habitual e doutros bens e dereitos.

3.3. A capacidade económica calcularase sumando todas as rendas computables, modificadas á alza pola suma dun 5% do patrimonio neto en cómputo anual e dividindo o resultado de dita suma entre o total de persoas que convivan no fogar.

3.4. O período que se computará na determinación da renda e do patrimonio será o correspondente ao último exercicio fiscal.

3.5. Malia o anterior, cando a capacidade económica da persoa usuaria só proveña da percepción de pensións, prestacións ou subsidios públicos, o período que se computará na súa determinación será o correspondente ao exercicio actual.

3.6. A capacidade económica da persoa usuaria determinarase en cómputo anual, sen prexuízo de que para o cálculo da súa participación no custo do servizo, se compute en termos mensuais calculada como a doceava parte da súa capacidade económica anual.

3.7. Os Servizos sociais do Concello de Vigo realizarán unha revisión anual para a actualización da información relativa á capacidade económica das persoas usuarias do SAF; sen prexuízo de que, se tivesen coñecemento dalgunha modificación na capacidade da persoa usuaria, poidan actuar de oficio para regularizar a súa situación.

4. PARTICIPACIÓN NO FINANCIAMENTO DO SERVIZO DAS PERSOAS DEPENDENTES CON DEREITO DE ATENCIÓN RECOÑECIDO COMO USUARIAS DO SAF.

4.1. No caso de que a capacidade económica da persoa usuaria do SAF para persoas dependentes valoradas con dereito de atención recoñecido sexa igual ou inferior ao Indicador Público de Rendas de Efectos Múltiples (IPREM), quedará exenta da obriga de participar no custo do servizo.

4.2. Nos demais supostos, aplicarase a seguinte táboa, na que se expresa o copagamento en termos de porcentaxe sobre a capacidade económica da persoa usuaria e en función da intensidade do servizo asignado:

Capacidade económica (referenciada ao IPREM) Ata	Grao I	Grao II	Grao III
	<=20 h	<=45 h	<=70 h
100,00 %	0,00 %	0,00 %	0,00 %
115,00 %	4,52 %	9,61 %	14,70 %
125,00 %	5,41 %	11,50 %	17,58 %
150,00 %	5,55 %	11,79 %	18,03 %
175,00 %	5,65 %	12,00 %	18,35 %
200,00 %	5,72 %	12,16 %	18,60 %
215,00 %	5,81 %	12,34 %	18,87 %

Capacidade económica (referenciada ao IPREM) Ata	Grao I	Grao II	Grao III
	<=20 h	<=45 h	<=70 h
250,00 %	6,03 %	12,82 %	19,61 %
300,00 %	6,24 %	13,26 %	20,29 %
350,00 %	6,42 %	13,63 %	20,85 %
400,00 %	6,54 %	13,90 %	21,25 %
450,00 %	6,63 %	14,09 %	21,55 %
500,00 %	6,70 %	14,25 %	21,79 %
>500 %	6,76 %	14,36 %	21,97 %

4.3. Nos casos en que, por renuncia parcial expresa da persoa beneficiaría ao seu dereito de atención co número de horas expresadas no PIA, ou cando por tratarse dun suposto de compatibilización do SAF con outro servizo ou prestación do catálogo, as horas reais prestadas de SAF sexan inferiores á cantidade expresada en cada columna da táboa anterior para o grao e nivel correspondente, a cantidade a pagar será minorada proporcionalmente á diminución das horas efectivas de servizo.

4.4. En ningún caso o importe da participación económica que deberá ingresar a persoa usuaria en concepto de participación no custo do servizo poderá exceder do 90%, do custe determinado en termos de prezo/hora.

5. PARTICIPACIÓN DAS PERSOAS USUARIAS NO FINANCIAMENTO DO SAF NO RÉXIME DE LIBRE CONCORRENCIA.

5.1. Para o SAF, en réxime de libre concorrència, das persoas que non teñan o recoñecemento da situación de dependencia ou non as asista o dereito de acceso efectivo ao catálogo de servizos de atención á dependencia, segundo o calendario de implantación que se establece na Lei 39/2006, de 14 de decembro, de promoción da autonomía persoal e atención ás persoas en situación de dependencia, aplicarase a seguinte táboa, que regula unha progresiva participación económica no custo do servizo en base ao cálculo da capacidade económica *per cápita*, tomando como referencia o establecido no artigo 60 do Decreto 99/ 2012 do 16 de marzo.

CAPACIDADE ECONÓMICA	% Achegas/ custe/hora
Menor ao 0,80 do IPREM	0%
Maior do 0,80 IPREM e menor ou igual a 1,50 IPREM	10,00%
Maior de 1,50 e menor ou igual a 2,00 IPREM	20,00%
Maior de 2,00 e menor ou igual a 2,50 IPREM	40,00%
Maior de 2,50 IPREM	60,00%

5.2. Sen prexuízo do anterior, poderán establecerse excepcións aos criterios xerais do referido copagamento nos casos en que a situación causante da aplicación do SAF sexa unha problemática de desestruturación familiar, exclusión social ou pobreza infantil; circunstancias que deberán estar debidamente xustificadas no correspondente informe social.

5.3. En calquera caso, establécese un límite máximo de participación económica das persoas usuarias do 40% da súa capacidade económica.

ARTIGO 5. DEVENGO, PERÍODO IMPOSITIVO, LIQUIDACIÓN E RECADACIÓN.

1. A obriga de pagamento desta taxa nace dende que se inicia a prestación do servizo correspondente e continúa ata a baixa ou suspensión do servizo.

2. O período impositivo será mensual. A liquidación da taxa, na que constarán os datos precisos para a determinación da cota correspondente á mensualidade que se indique nela, practicarase por meses naturais. Cando os recibos mensuais fosen de escasa contía, o Servizo de Benestar social poderá acumular as cotas devengadas mensualmente nun só recibo trimestral.

3. Procederá o rateo da cota correspondente ao mes de inicio en función dos días que resten ata o último do mes, pasándose ao cobro xunto coa liquidación da primeira mensualidade seguinte.

4. Cando por causa debidamente xustificada o usuario deixe de recibir o SAF, o suxeito pasivo estará exento de aboar a cota mensual desde a data que se estableza na resolución acordando a suspensión. A

suspensión da cota durará ata o primeiro día no que teña lugar a reincorporación do usuario ao servizo, procedendo ao rateo da cota da mesma forma que no inicio da prestación.

A solicitude de suspensión da cota, xunto coa acreditación documental da circunstancia que a motiva, deberá presentarse no Rexistro xeral municipal coa antelación de quince días naturais anteriores ao da resolución sobre a procedencia da suspensión. En calquera caso, será imprescindible o informe da traballadora social, co visto e prace da Xefatura do Servizo de Benestar social, que se incorporará ao expediente. Nos casos en que o órgano competente municipal resolva a non procedencia da suspensión solicitada, procederá á liquidación dos días non incluídos en anteriores recibos.

5. Tamén se rateará a cota mensual nos supostos de baixa no servizo, que será efectiva dende a data que conste na resolución de finalización daquel.

6. O pagamento das taxas realizarase a mes vencido por domiciliación bancaria dos recibos que autorizará o/a solicitante do servizo no momento da sinatura do contrato e deberán ser satisfeitos o día 10 de cada mes ou inmediato hábil seguinte.

No suposto de que a domiciliación dunha mensualidade fose devolta por causa imputable á persoa titular da conta de cargo, iniciárase o procedemento perceptivo, coas consecuencias legais correspondentes, pola mensualidade non pagada.

A devolución dunha mensualidade non supoñerá a baixa da domiciliación das vindeiras.

7. Se por calquera motivo o servizo non se prestase por causas non imputables á persoa usuaria, esta terá dereito a unha redución proporcional da cota mensual.

8. Se o servizo non se prestase por causas imputables á persoa usuaria, non haberá lugar a redución ningunha, mentres non se formalice a baixa ou a suspensión temporal correspondente.

ARTIGO 6.- INFRACCIÓNS E SANCIÓN.S.

En todo o relativo á cualificación das infraccións relativas a esta Ordenanza así como á determinación das sancións que polas mesmas correspondan en cada caso, aplicarase o réxime establecido na Lei

58/2003, do 17 de decembro, Xeral Tributaria e normas de desenvolvemento desta.

ARTIGO 7. AFECTACIÓN DOS INGRESOS MUNICIPAIS POLO COPAGAMENTO DOS SERVIZOS.

De conformidade co Art. 56.7 de Lei 13/2008, do 3 de decembro, de servizos sociais de Galicia, en todo caso, os ingresos que recade o Concello de Vigo en concepto de achega das persoas usuarias para a súa participación no custo dos servizos sociais comunitarios estarán afectados ao financiamento dos servizos sociais que reciban.

DISPOSICIÓNS FINAIS.

1ª. No non previsto nesta Ordenanza será de aplicación a Ordenanza Fiscal Xeral, a Lei 58/2003 Xeral Tributaria, e a restante normativa de aplicación.

2ª. Esta modificación entrará en vigor ao día seguinte da súa publicación no BOP e comenará a aplicarse o 1 de xaneiro de 2024 permanecendo vixente en tanto non se acorde a súa modificación ou derogación expresa.

PUBLICACIÓNS B O P.:	30 DE DECEMBRO DE 1998
	30 DE NOVIEMBRE DE 2001
	26 DE DECEMBRO DE 2002
	30 DE DECEMBRO DE 2003
	10 DE DECEMBRO DE 2007
	10 DE DECEMBRO DE 2008
	05 DE OUTUBRO DE 2009
	14 DE DECEMBRO DE 2010
	12 DE DECEMBRO DE 2016
	12 DE NOVIEMBRE DE 2019
	4 DE DECEMBRO DE 2023

